



PREZIDÉNSIA
KONSELLU
MINISTRUS
VIII GOVERNUN KONSTITUSIONÁL



Gabinete
Porta-Voz

KOMUNIKADU IMPRENSA

Sorumtuk Konsellu Ministrus nian iha loron-17 fulan juñu tinan 2020

Konsellu Ministrus hala'ó sorumtuk iha Palásiu Governu, iha Dili no aprova ona Projetu Rezolusaun Governu nian, ne'ebé apresenta hosi Ministru Justisa, Manuel Cárceres da Costa, kona-ba nomeasaun ba Tiago Amaral Sarmento nu'udar vogál efetivu ba Konsellu Superiór Majistratura Judisiál. Konsellu ida-ne'e nia knaar maka jere no hatuur disiplina ba atividade sira Majistradu Judisiál sira nian no mós nomeia, koloka, transfere no promove juis sira iha Timor-Leste. Konsellu Superiór Majistratura Judisiál nian prezide hosi Juiz Presidente Supremo Tribunál Justisa nian no kompostu husi vogal na'in-haat, ne'ebé ida Governu maka nomeia.

Aprova ona mós projetu Dekretu-Lei kona-ba Rejime Jurídiku ba Vijilánsia Epidemolójika no Vijilánsia Sanitária. Objetivu husi diploma ida-ne'e, atu oferese ba autoridade vijilánsia epidemolójika no sanitária sira medida lubuk ida ne'ebé mak adekua ba protesaun no promosaun ba saúde pública, iha tempu normál no mós iha iha tempu situasaun emerjénsia nian, sein prejúzu ba rejime espesiál hosi situasaun exesaun konstitusionál. Nune'e, projetu Dekretu-Lei ne'e hakarak atu garante mekanizmu sira atu fó protesaun ba saúde pública, hodi evita no neutraliza risku moras, habelar no hadaet ba populasau.

Ministru Transporte no Komunikaun, José Agostinho da Silva, halo apresentasaun ida ba Konsellu Ministrus kona-ba rejistu no organizaun ba servisu sira inspeksaun nian ba ró-ahi no embarkasaun sira. Apresentasaun ida-ne'e nia objetivu mak atu uluk-nana'in halo análise ba projetu Dekretu-Lei rua ne'ebé buka atu estabelese norma no prosedimentu sira rejistu no servisu inspeksaun nian kona-ba oinsá utiliza ró-ahi no embarkasaun nasional



Palácio do Governo,
Avenida Presidente Nicolau Lobato,
Dili, Timor-Leste



PREZIDÉNSIA KONSELLU MINISTRUS

VIII GOVERNUN KONSTITUSIONÁL



Gabinete
Porta-Voz

sira, tuir padraun internasionál seguransa marítima no protesaun ba ambiente mariñu. Konsellu Ministru sei analiza filafali projetu Dekretu-Lei rua ne'e no sei apresia hikasfali iha sorumutuk Ezekutivu nian tuirmai.

Ministru Defeza, Filomeno da Paixão de Jesus, halo mós apresentasaun ida ba Konsellu Ministrus kona-ba kriaun Autoridade Marítima Nasionál (AMN) no defini Autoridade ne'e nia knaar sira no ninia estrutura koordenasaun nian. Hakarak atu AMN sai nu'udar entidade respomsável ba koordenasaun atividade sira, iha âmbito nasionál, ne'ebé sei ezejuta hosi Komponente Forsa Navál no hosi Diresaun Autoridade Marítima Nasionál, iha área jurisdisaun no kuadru Sistema Autoridade Marítima nian, kumpri ba instrusaun sira ne'ebé defini ona hosi Ministru Defeza. Governu sei analiza filafali kona-ba oinsá atu kria instituisaun ne'e no sei apresia filafali iha sorumutuk Konsellu Ministrunian tuirmai. **Remata**



Palácio do Governo,
Avenida Presidente Nicolau Lobato,
Dili, Timor-Leste